



SIPA PRETRESLA STAN ŠEJLE TURKOVIĆ

KO JE SORAJA Q?

Turkovićeve je osumnjičena za povredu tajnosti postupka, odnosno da je sa svoje IP adrese, pod pseudonimom Soraja Q, uploadovala snimke suđenja njenom suprugu

Pripadnici SIPA jučer ujutro pretresli su kuću Šejle Turković u Hercegovačkoj ulici u Sarajevu i izuzeli određene predmete koji mogu poslužiti kao dokaz u daljem postupku.

Provala u kuću

Iz SIPA je saopšteno da se Turkovićeve sumnjiči da je počinila krivično djelo povreda tajnosti postupka, na način da je neovlašteno objavljivala materijale iz postupka koji se vodi pred Sudom BiH.

Prema riječima Turkovićeve, pripadnici SIPA jučer su tražili kompjuter i CD-ove sa suđenja koje joj je njen suprug Zijad Turković dostavio. Pojasnila je da joj je suprug pored CD-ova na kojima su snimljena suđenja, prije nego što je prebačen u zenički zatvor, dostavio i određenu dokumentaciju te odjeću. Dodaje da joj je 2. jula provaljeno u kuću, te da sumnja da se radilo o "pripadnicima određenih službi".

Provalnici su, kako ističe, sve razbacali po sobama i tražili doku-


mentaciju. Policija je odmah došla i obavila uviđaj, no ona nije željela davati izjave lokalnoj policiji "jer im ne vjeruje".

"Provala se desila par dana nakon što sam dostavila određeni dokument američkom tužiocu EULEX-a. Sljedeći dan dolazi mi naredba SIPA da izvrše kontrolu mog kompjutera, gdje se tvrdi da sam ja uploadovala suđenja Zijadu Turkoviću na YouTube. Međutim, kad su vidjeli moj kompjuter, koji je jedna stara krtinja koja uopšte nema CD ni DVD, onda im je bilo jasno da to uopšte ovdje nije rađeno. Međutim, oni su rekli da imaju tu IP adresu. Rekla sam da sam tek nedavno zaštitila svoju IP adresu, a dotad me je mogao hakirati ko je htio. Također sam dodala da sam bila u prilici da stavim ta suđenja na internet, uradila bih to", rekla je Turkovićeve, dodajući da su hakeri i sa njenog Facebook profila i sa IP adrese slali poruke.

Djelo iz 2013.

Ona dodaje da je nalog SIPA za pretres kuće imao jučerašnji datum, ali da se ona sumnjiči za djelo iz 2013. godine. SIPA je, kaže, reagovala tek sad na osnovu dopisa koji im je 31. maja 2013. dostavila OSA/OBA. Iz tog dopisa, prema njenim riječima, proizlazi da je koristila IP adresu e-maila na koji je registrovan korisnik Soraja Q, te objavljivala videozapise sa suđenja njenom suprugu Zijadu Turkoviću.

Podsjetimo, u Sudu BiH je Zijad Turković osuđen na 40 godina zatvora zbog ubistava, krijumčarenje narkotika, pljačku 2,5 miliona KM iz Cargo-centra na Aerodromu i iznude. Šejla Turković je svjedok optužbe Ureda Specijalnog tužilaštva Kosova, koja tereti Namera Kelmendija za rukovođenje velikom narkoorganizacijom, a njoj je u toku suđenje zbog ugrožavanja sigurnosti advokata Izeta Baždarevića. Turković je nedavno, podsjećamo, optužen i za napad na čuvara u pritvorskoj jedinici Suda BiH. **D. P.**



Page: 16

Reach: 0

Country: BOSNIA AND HERZEGOVINA

Size: 467 cm2

2 / 2

